

SIPPUS Justino coævus apud EUSEB. L. 4. cap. 22. edit. VALESII. Epistola Ecclesie Viennensis apud EUSEB. Hist. Eccl. L. 5. cap. 4. CLEMENS ALEXANDR. qui ante TERTULL. scripsit, L. 6. Stromat. diserte Episcopos, Presbyteros distinguens. Ac TERTULLIANUS ipse, qui licet sec. III. ineunte florere cœperit, discrimen tamen hoc clericorum a laicis, et ipsorummet ministrorum hierarchicum ordinem, non sua primum ætate inventum, sed ut quid omnibus notum ac vulgare supponit L. de Præscript. cap. 41.

15. Obj. I. cum Calv. et Luth. Populus christianus unus et simplex esse debet, in quo nulla personarum differentia, nullus clericus, nullus laicus, nullus unctus. Prob. 1º. Ex Apostolo ad Gal. 3. v. 28. *Non est Judæus, neque Græcus: non est servus, neque liber: non est masculus, neque femina. Omnes enim vos unum estis in Christo Jesu.* Ergo omnem distinctionem et eminentiam unius pœlio inter Christianos rejicit. 2º. S. Petrus epist. sua priore cap. 5. totam Ecclesiam clerum appellat ad Episcopos scribens: *Pascite, qui in vobis est gregem Dei, providentes non coacte, sed spontanee, neque turpis lucri gratia, sed voluntarie, neque ut dominantes in clericis, sed forma facti gregis ex animo;* igitur errore et traditione impia ab honore clerici nominis dejecti sunt laici. 3º. Christus damnat istam diversitatem status inter Pastores et plebem: *Qui voluerit inter vos major fieri, sit vester minister,* Matth. 20. Alios textus art. seq. dabimus. 4º. Omnes Christiani fratres Christi sunt: sed Christus vere Sacerdos est; ergo et illi; ergo in epte illa differentia statuitur.

R. 1º. Vox illa, spectato adversariorum sensu, simillima est illi rebellium Core, Datan et Abiron, qua olim impetebant sacerdotes Testamenti veteris Num. 16. *Sufficiat vobis, quod omnis multitudo sanctorum est, et in ipsis est Dominus, cur elevamini super populum Domini?* At quorum schisma severe castigavit Deus: *Dirupta est terra sub pedibus eorum, et aperiens os suum devoravit illos, cum tabernaculis suis, et universa substantia eorum, descenduntque vivi in infernum.*

R. 2º. D. Ant. Populus christianus debet esse unus et simplex unitate fidei; item animorum, ut idem sentiant, nec sint in eis schismata. C. unitate status, sensu adversariorum N. Priorem unitatem urget Paulus ad Ephes. 4. hortans eos servare unitatem spiritus in vinculo pacis, quia *unus Dominus, una fides, unum baptisma, unus Deus et Pater omnium.* Cum hac vero unitate æque parum pugnat distinctio clericorum et laicorum, quam diversitas munerum, de quibus ibid. Apostolus. *Ipse dedit quosdam quidem Apostolos, quosdam autem Prophetas, alias vero Evangelistas, alias autem Pastores et Doctores ad consummationem sanctorum in opus ministerii* v. 11. Item, quam membrorum distinctio cum unitate corporis. Unum est humanum corpus; neque tamen totum est oculus, auris, manus, pedes; alias, ut ait Apostolus 1. Cor. 12. *Si totum corpus oculus, ubi auditus? ubi odoratus?... et si essent omnia unum membrum, ubi corpus? nunc autem multa quidem sunt membra; unum autem corpus.* Ita plane in Ecclesia alii clerici, alii laici; ac rursus clericorum alii sacerdotes, alii ministri; laicorum alii principes, alii subditi: sed haec membrorum et partium varietas est, corpus vero unum, quoniam unus omnium Dominus est, una fides, unum baptisma, unus Deus Pater, uno pane nutrimur.

Ad prob. 1º. D. Cons. Rejicit distinctionem omnem et praeminentiam in ordine ad clericos et laicos in Ecclesia N. de hoc enim ibi ne cogitat quidem Apostolus: in ordine ad justificationem, salutem aliasque gratias in Christo vel per Christum consequendas C. Neque enim verbis illis: *Non est Judæus, etc.* Apostolus excludere ab Ecclesia diversitatem sexuum, nationum, conditionum voluit, qui enim alias Ecclesia consisteret? sed æque parum clericorum et laicorum differentiam exclusam voluit; verum monere tantum, non illa esse, quæ filios Dei faciant, et regni æterni hæredes, sed fidem, quæ nos verum Abrahæ semen efficit, cui facta uni, juxta v. 16. hæreditatis promissio; et in hoc jam nos omnes unum in Christo, sive pares esse; ait enim: *Omnes enim filii Dei estis per fidem, quæ est in Christo Jesu. Quicumque enim in Christo baptizati estis, Christum induistis. Non est Judæus, neque Græcus, etc. omnes enim vos unum estis in Christo Jesu.* Tum concludit: *Si autem vos Christi; ergo semen Abrahæ estis, secundum promissionem hæredes.* Unde, spectato scopo Apostoli, æque potuisse dicere: non est clericus, neque laicus; quia æque parum sine fide prodest conditio cleri et laici, quam liberi et servi, quam maris et feminæ, Judei et Græci; cum hæredes Regni non istæ graduum et conditionum differentiæ, sed fides, cum spe et charitate, constitutat.

Ad prob. 2º. R. 1º. N. haec, in clericis, a S. Petro ad totam Ecclesiam referri; sed de iis tantum re ipsa dici, qui proprie clerici dicuntur; ita S. HIERON. epist. ad Nepotian. cit., et OECUMENIUS in Commentario hujus epistolæ sentiunt. Tametsi enim ad Episcopi gregem et clerici et laici pertineant, quia tamen magis erat periculum, ne fastuosum imperium Episcopi exercerent in clericos, quam laicos, quod clerici, utpote vi status sui Episcoporum administri, iis sint magis subjecti quam laici; idcirco S. Petrus Episcopos monet, ut totum quidem gregem diligenter pascant; in pascendis vero laicis fugiant turpe lucrum, in regendis clericis arrogantem dominatum. Quo proinde non damnatur Episcoporum potestas ipsa, et jurisdictionis in subjectos clericos, sed potestatis abusus et fastus imperii.

R. 2º. Permissio gratis Ant. N. Cons. Potest enim eadem cleri appellatio tribui ratione diversa tum Ecclesiæ toti, tum solis Ecclesiæ ministris. Tametsi proinde Ecclesia universa sors hæreditas sit Christi, quod eam acquisierit sanguine suo; eo tamen non obstante certa Ecclesiæ portio, consecrata ministerio altaris magis propria ratione dici potest sors Christi et hæreditas, non secus, ac olim totus Hebreorum populus passim vocabatur hæreditas Domini, quod eum Deus liberasset servitute Ægypti, itaque velut redemisset, ac tamen solam tribum Levi, quam rebus sacris præficerat, ratione quadam speciali sortem suam et hæreditatem esse voluit Num. 18. et Deut. 18. Porro Levitis, qui speciali modo sors Domini dicebantur, non respondent nunc in Christi Ecclesia Christiani omnes, sed sacerdotes soli, eorumque ministri.

Ad prob. 3º. R. N. A. Eo enim loci, occasione ambitiosi postulati matris filiorum Zebedæi, humilitatem commendat; suosque monet, ne dominationem imperiosam et acerbam exerceant; premitit enim: *Seitis, quia principes gentium dominantur eorum, et qui majores sunt, potestatem exercent in eos.* Non ita erit inter vos. Vult igitur solum nouo modo præesse suos, quo principes gentium dominantur, h. c. dominatione austera;

græcum enim κατακυριεύουστ dominatur, ipso Beza ad eum locum teste, significat dominari contra eos, dominatione imperiosa, cumque acerbitate conjuncta.

Deinde observo ad eum locum contra Calvin. qui illo plurimum nititur, ut hierarchiam Ecclesiasticam ac clericorum præminentiam convellat, rectius multo ac solide dogma catholicum stabiliri. Nam 1^o. non ait Christus, vos non presidebitis ullo modo, sed non sicut principes gentium vel infidelium, qui sine suorum amore bonove et gravi præsunt imperio; qui autem dicit, tu non sic præeris sicut ille, id significat, tu præeris quidem, sed aliter quam ille. 2^o. Nonne clare subjungitur: *Quicumque voluerit inter vos major esse, sit vester minister, et qui voluerit inter vos primus esse, erit vester servus?* Lucae autem 22. 26. Qui major est in vobis, fiat sicut minor, et qui præcessor, græce τριγονός, sicut ministrator; ergo supponitur aliquis ipsos inter Apostolos major futurus reliquis, quo nihil clarior pro hierarchia Ecclesiastica. 3^o. Suum exemplum adhibet: *Sicut filius hominis non venit ministrari, sed ministrare;* sicut ergo Christus vere præerat omnibus, licet non ita, ut more regum gentium dominaretur, sed potius ministraret, ita vult suos præesse aliis, sine tamen dominandi libidine, sed præesse Ecclesiæ ut pastores et patres.

Ad prob. 4^{am}. R. D. A. Omnes sunt fratres adoptione C. natura N. At filii adoptivi non gaudent ea amplitudine jurium, quibus naturales, intellige, ut naturalis opponitur adoptivo. Quin in illustribus familias naturales fratres non semper juribus pares sunt, non raro sibi potiora vindicante, qui inter eos primogenitus est.

16. *Obj. II.* Plurimum nituntur Catholici ad probandum inter clericos et laicos discrimen epistolis S. Ignatii M. sed ex his nihil evinci potest. *Prob. min.* Nullas enim scripsit epistolas Ignatius; sed pleræque, quæ ejus inscribuntur nomini, conflictæ sunt. Ita passim ex adversariis Protestantium plures sine rationibus alii. *Prob. 4^o.* In epistolis Ignatii denominationes Episcoporum, Sacerdotum, Clericorum leguntur, quæ duobus prioribus seculis erant incognitæ. 2^o. Si genuinæ essent epistolæ, Ignatius non Apostolicus, sed apostaticus esset vir; quippe qui in suis epistolis ipsos etiam reges regio clericorum sacerdotio subjicit. Hactenus Boehmer. *Dissert. 7. §. 41.* 3^o. In epist. ad Magnesianos refellit errorem Valentinianorum: *Quoniam unus Deus est, qui manifestavit se ipsum per Jesum Christum filium ipsius, qui est ipsius Verbum æternum, non a silentio progrediens;* Valentinus vero in suo commento de Syzygibus æonibus Verbum aiebat prodiisse e Sige, quæ est silentium, ut de eo notat S. Epiph. ex Irenæo. Ergo Ignatii hæc saltem epistola esse nequit, utpote qui vixit ante Valent. hæresin; orta enim ea est hæresis an. 140. At Ignatius post S. Petrum et Evodium sedere cœpit in Antiochenæ sede an. 71. ut communiter volunt Chronologi, et testibus iisdem sedit annis 40. Romæ passus anno undecimo Trajani, unde fit, 30. ante Valent. hæresiarcham annis decessisse IGNATIUM. 4^o. In ead. epist. dignitatem episcopalem et προστατευταν vocat νεωτερικὴν ταξιν, h. e. recentiorem ordinem; sed hoc ipsis adversatur Catholicis; sequeretur enim hunc ordinem tunc primum fuisse inventum, cum conficeretur epistola, petit enim ea epistola Ignatii a Presbyteris illius Ecclesiæ, ut patienter ferant, nunc

Episcopum sibi recens contra ac alias fuisse, omnibus præpositum. Ita item aliis.

Non abs re me facturum credidi, si paucis saltem, et quantum satis epistolarum S. Ignatii M. vindicias ponem; quarum videlicet testimoniis tum aliis in dogmatibus, tum præsertim quoad ordinem magnopere illustratur et adstruitur traditio Catholica. Quare ad argumentum

R. T. Maj. Quia, etsi, ut modo dictum, iis sat clare adstruatur Catholica de Ecclesiasticorum ordinum discriminé traditio, si tamen etiam illæ non essent, adhuc subsisterent rationes conclusionis cæteræ, et quæ art. seq. proferentur. N. min. et hujus prob. si tamen probatio dici queat, et non potius assertum inane nimium temere et inscite prolatum.

Nam 1^o. teste antiquissimo et ejusdem cum S. Ignatio etatis Polyc. in epist. ad Philippenses (PP. apost. opp. p. 273. edit. Hefel.) quam in Asianis Ecclesiis legi solitam asserit S. Hieron. de Scriptor. (al. de viris illust.) c. 7. S. Ignat. scripsit epistolas utilissimas, quas ait Polycarp. ibid. collegisse se quotquot invenire potuisse. 2^o. Suppar etatis utriusque et Polyc. discipulus IRENÆUS ad epistolam Ignatii ad Romanos provocat, ex eaque sententias producit L. 5. contra hæreses cap. 28. quod et refert Eusebius Histor. L. 3. cap. 36. fidem epistolarum Ignatii, Polycarpi auctoritate adstruens. 3^o. ORIGENES homil. 6. in Lucam (opp. t. 3. p. 938. A.) Ignatium laudat ejusque epistolam, qua dixerat, Virginis partum latuisse principem hujus seculi, hoc est, diabolum; qui locus extat in Ignatii epistola ad Ephesios: ad hanc quoque S. Athanasius appellat, inde sententias referens L. de Synodis n. 47. pag. 709. Theodoret. Dial. 1. p. et alibi. 4^o. Eusebius L. 3. Histor. cap. 30. S. Hieron. loc. cit. septem recensent S. Ignatii epistolas: unam ad Ephesios, alteram ad Magnesianos, tertiam ad Trallianos, quartam ad Romanos, quintam ad Philadelphos, sextam ad Smyrnæos, septimam ad Polycarpum. Præter has, quinque adhuc aliae reperiuntur, una ad Mariam Cabassolitam, ad Antiochenos altera, ad Tarsenses tercia, ad Philippenses quarta, ad Heronem quinta; que quidem ad manus Eusebii et Hieron. non pervenerunt; ob stili tamen similitudinem, et spiritum vere apostolicum, inquit BELLARM. de Script. Eccles. de S. Ignatiō, a viris doctis recipiuntur. Item tres aliae, ad B. Virginem Deiparam una, duæ ad S. Joannem Evangelistam; sed neque in Codicibus Græcis habentur, neque gravitatem eloquit S. Ignatii omnino redolent. Unde et de prioribus septem hic nobis solum disputatio erit. Præterea 5^o. præter memoratos ante, epistolarum Ignatii mentionem faciunt, apud PETAV. L. 2. de Hier. Eccl., Chrysostomus, Antiochus, Joan. Dainascenus, Antonius Melissa, Phot. plurimique alii. Inscite igitur et temere prorsus negatur, ulla ab Ignatio Martyre epistolas scriptas fuisse.

At priores Ignatii epistolæ, quas Eusebius et Hieronymus referunt, atque omnes, præter Romanam, quæ sola desideratur, anno 1646. Lugduni Batavorum Isaac Vossius e Bibliotheca Florentina acceptas edidit, omni carent prudenti suspicione suppositionis. Multum illæ discrepant ab iis, quæ antea sparsim circumferebantur; habentque hanc characteristicam authentiae notam, quod omnes in illis reperiantur sententiae, eodemque prorsus verborum ordine, quo eæ ab antiquis Patribus ex Ignatii epistolis citatae leguntur, quæ quidem in vulgatis antea diversisqne editionibus absunt, quas

proin merito eruditorum crisis in dubium, vel corruptionis suspicionem vocaverat: vide hujus rei exempla apud Petav. Theol. Dogm. de Incarn. L. 3. cap. 6. Consonant etiam cum latina versione veteri, quam diu latenter, sed fortuna repertam aliquot ante Vossium annis edidit Jacobus Usserius. Nihilque similius, quam illa versio latina vetus Usserii, et codex græcus Florentinus divulgatus a Vossio, ut nemo prudenter dubitet, illas esse genuinas Ignatii epistolas, quas antiquorum consensus illustribus adeo testimonios commendatas et approbatas reliquit. Nunc

Ad prob. 1^{am}. R. 1^o. Nonne Paulus ad Philippos. 1. v. 1. orditur epistolam: *Paulus et Timotheus servi Jesu Christi omnibus sanctis in Christo Jesu, qui sunt Philippis, cum Episcopis et Diaconis?* sive ut versio habet Syriaca: *cum Presbyteris et Diaconis?* Nonne idem *Presbyterorum* nomen adhibet ad Tit. 1. v. 5.? Lucas *Episcoporum* Act. 20. v. 28. Non tamen ideo hæc supposititia sunt. 2^o. Falsum, quod nomen *sacerdotis, cleri* usurpet, ut ex allatis verbis liquet; sed quod vulgariter clerum modo dicimus, Ignatius per *præcipuos Ecclesiæ ministros* expressit, *Episcopos, Presbyteros, Diaconos*, quod quoad rem, de qua sola est nobis disputatio, perinde est. 3^o. Manifestum circuli vitium committit scriptor utut cetera clarus, dum per id, quod est in quæstione, alterum ræque controversum vult dirimere. Quæritur enim, utrum duobus primis seculis inter clericos, sive ministros Ecclesiæ, et laicos fuerit discrimen? Affirmant Catholici idque probant ex S. Ignatio M. Negat Boehmerus cum suis, genuina illa esse Ignatii loca, quia in his ministrorum Ecclesiæ distinctorum inter se et a laicis fit mentio. Quod sane in tanto viro nemo non rideat.

Ad prob. 2^{am}. Nihilo melior hæc ratio est præcedenti. *N. seq.* Subjicit fideles omnes regiō sacerdotio, sed in *spiritualibus*; in politicis omnes tum Cæsari fuisse subditos, nemo ambigit. Reges ibidem Ignatius nequidem nominat; sed, etsi non nominet, etiam hi in *spiritualibus* sacerdotio subjecti sunt; cum nusquam eximantur, ac, licet dignitate præemineant; hæc solum politica est, eos nihilominus *in statu laicorum* relinquens. Neque illud *apostatici* est dicere, nisi apostaticum quis velit Apostolum facere, qui regimen hoc spirituale sat luculente exercuit 1. Cor. 3. et declaravit Mileto digres- surus Episcopos extremum alloquens: *Vos Spiritus sanctus posuit Episcopos regere Ecclesiam Dei.* Et ostendit passim alibi. Vel si ex hoc ipso capite rejiciendas ut spurias velit epistolas, quod in iis *spirituali* Episcoporum regimini subdantur reliqui; rursum, ut ante, in turpe incidet vitium circuli.

Ad prob. 3^{am}. R. N. A. Falsa et inanis haec conjectura est; longe enim di- versus est verborum Ignatii sensus. *Verbum* hujusmodi, vel *Sermonem* (ita enim Latinorum veterum quidam λόγον interpretati sunt) Ignatius ait esse Christum Dei Filium, non qualis creatus et humanus sermo est, qui post silentium oritur, et in silentium desinit; non enim est aeternus: sed Dei Filius est Verbum non a silentio prodiens, quia est aeternum, illudque Pater produxit ab aeterno. Audiamus AUGUSTINUM serm. 4. de Nat. Dom. (al. serm. 369.) ad eum sensum nobis ita præeuntem: *Quenam est illa genera- tio, qua in principio erat Verbum, et Verbum erat apud Deum, et Deus erat Verbum? Vel quod est hoc Verbum, quod dicturus ante non silebat: quo dicto non siluit, qui dicebat? Quod est Verbum sine tempore, per quod facta sunt tempora? Verbum quod labia nullius aperuit cæptum, clausitve finitum.*

Ad prob. 4^{am}. N. Maj. νεωτερικὴ τάξις, est novitia ac recens ordinatio, vel institutio, quæ jactari tum cœperat, quibusdam ambitiose molientibus, ut Episcopatus, non libera electione conferretur, sed antiquissimo, hoc est, ex ætatis vel temporis antecessione, quo in clerum erant assumti. Nam hactenus, ex Apostolica ordinatione, non antiquiores quique, sed aptiores et digniores per Ecclesias instituebantur Episcopi; quod in Timotheo fecit Apostolus; hunc enim juniores veteranis prætulit; et ideo monet, ut ita se gerat in administranda Ecclesia, ut ne adolescentiam ipsius contemnant, et ejus electione offendantur alii, 1. Tim. 4. 12. *Nemo adolescentiam tuam contem- nat.* Tum ut idem in eligendis præpositis Ecclesiarum institutum teneant, tam illi, quam Tito præcepit; nam utrique, quales eligere oporteat Episco- pos, h. e. quibus ornatos virtutibus præscribit ad Tit. 1. Hæc igitur est νεω- τερικὴ τάξις nupera, recens institutio ab Apostolico præscripto et ordinatione deflectens, quam quidam, unus et alter ἡ ή δύο πρόσωπα introducere vole- bant, querentes, sibi prælatum alium, qui in clerum posterius adscri- plus esset.

Istud vero aperte falsum, Ignatium ibi hortari presbyteros, ut patienter ferant, superimponi sibi Episcopum nunc, qui unus præsit omnibus, quasi non ita jam ante fuisset; ut enim legenti epistolam patebit ad oculum, presbyterorum exemplo utitur ad movendo Magnesianos, ut, licet ætate juniores, Episcopum revereantur. En verba: *Sed et vos decet non conti- actate Episcopi, sed secundum virtutem Dei Patris omnem reverentiam ei tribuere, sicut agnovi et sanctos presbyteros, non assumentes juniores ordinem, quo volebant quidam antiquiores præferri, sed ut prudentes in Deo concedentes ipsi;* ergo presbyteri de hoc non querebantur.

17. *Inst.* In epistola ad Ephesios auctor aperte dogma Arianum tradit; ergo vel Ignatii non est, vel hic Christi divinitatem non credit. *Prob. Ant.* Christum enim ibi *factum* dicit, teste THEODOR. Dial. p. 1, (opp. t. 4. p. 33.) ubi locum ita recitat: *factus ex non facto*, ut etiam codex Floren- tinus habet γενητὸς ἐξαγενήτου, sed hoc rigidi Ariani dicebant.

R. N. *Ant.* *Ad prob. D. Maj.* Dicit factum *simpliciter*, ut alias creature dicuntur factæ *N.* Dicit factum, scilicet hominem *C.* Hoc sensu ipse Theodoreus Dial. cit. verba Ignatii, *factus ex non facto*, refert, ut ibid. contra Eutychianum duplicum in Christo naturam ex Ignatio probet. Estque sensus: qui qua Deus est non factus; postea tamen est factus, nimirum homo. Utrumque igitur, et *factus*, et *non factus* unum euædemque Christum appellat; non vero ista *ex non facto* Patrem respiciunt, quasi ab hoc factus esset Filius, ut perperam putant adversarii. Id amplius ex S. Athanasio per- spicimus, qui L. de Synodis pag. 709. ex eadem epistola hunc ipsum locum totum ita refert: *Unus medicus est carnalis et spiritualis: factus et non factus: in homine Deus: in morte vita aeterna: ex Maria, et ex Deo: Do- minus noster Jesus Christus.*